

# PM mahu Laporan Ketua Audit dibahas, diambil tindakan wajar

Jabatan,  
agensi wajib  
teliti teguran  
elak ulang  
kesilapan

Oleh Mohd Iskandar Ibrahim  
mohd\_iskandar@bh.com.my

**Putrajaya:** Datuk Seri Anwar Ibrahim mahu Laporan Ketua Audit Negara yang dikeluarkan setiap tahun dibawa untuk perbincangan di Dewan Rakyat dengan setiap teguran dikemukakan diambil tindakan wajar.

Perdana Menteri berkata, ia penting untuk memastikan setiap kesilapan yang dikesan dan diberikan teguran oleh Ketua Audit Negara tidak diulang semula berikutan ketiadaan tindakan susulan diambil.

Justeru, beliau menegaskan se-

tiap kementerian, jabatan dan agensi wajib untuk meneliti Laporan Ketua Audit Negara itu dan mengambil tindakan susulan.

“Saya (akan) pastikan ia (Laporan Ketua Audit Negara) dibahas (di Dewan Rakyat) dan kalau ada pelanggaran, ia harus dibetulkan. Kalau ada penyalahgunaan kuasa mesti kita ambil tindakan.

“Jika tidak, laporan sampai tahun depan sekali akan diulangi lagi, jadi audit untuk apa, baik ke bakul sampah. Jadi mulai sekarang setiap teguran itu tidak semestinya mutlak, kalau dia (jabatan, kementerian atau agensi) ada jawapan, dia jawablah.

“Sebab itu, sebaik laporan dibentangkan oleh (Ketua Audit Negara) Datuk Wan Suraya Wan Mohd Radzi, masing-masing diwajibkan meneliti semua laporan ini dan memberi jawapan dan tindakan yang memuaskan,” katanya.

Beliau berkata demikian ketika berucap pada Sesi Perjum-

paan Perdana Menteri bersama Pengurusan dan Warga Jabatan Audit Negara di sini, semalam.

Jun lalu, Persidangan Dewan Rakyat kecoh selepas Speaker, Tan Sri Johari Abdul setuju supaya Laporan Ketua Audit Negara 2021 dibahas oleh Ahli Parlimen.

Pembangkang mempersoalkan tindakan kerajaan membawa usul supaya dibahas Laporan Ketua Audit Negara 2021 di Dewan Rakyat, dengan menyifatkan keputusan itu bercanggah Perkara 107 Fasal 1 Perlembagaan Persekutuan.

Ketua Whip Perikatan Nasional (PN), Datuk Seri Takiyuddin Hassan, berkata peruntukan Perlembagaan itu menetapkan Laporan Ketua Audit Negara perlu dikemukakan kepada Yang di-Pertuan Agong terlebih dahulu sebelum dibentangkan di Dewan Rakyat.

Dalam pada itu, Anwar berkata, walaupun teguran dalam Laporan Ketua Audit Negara ditujukan kepada Kerajaan Perpa-

duan, ia seharusnya diambil tindakan kerana sebarang kecurangan membabitkan tata kelola atau tadbir urus, tidak boleh di pandang ringan.

“Ini untuk memastikan supaya laporan ini akan diteliti Suruhanjaya Pencegahan Rasuah Malaysia (SPRM), Lembaga Hasil Dalam Negeri (LHDN), Kementerian Kewangan dan semua agensi penguatkuasaan seandainya jabatan berkenaan tidak mengambil tindakan susulan kepada teguran Jabatan Audit Negara,” katanya.

## Perluas bidang tugas

Dalam perkembangan berasingan, Perdana Menteri memaklumkan skop tugas Jabatan Audit Negara tidak lagi sekadar dalam konteks pengauditan, sebaliknya akan diperluaskan meliputi kerangka ombudsman.

Bagaimanapun, katanya, perkara itu masih pada peringkat perbincangan untuk memastikan skop tugas Jabatan Audit Negara dapat diperkukuhkan.

“Berdasarkan prestasi Jabatan Audit Negara yang memuaskan dan teguran semua jabatan persekutuan dan negeri, saya sekarang sedang meneliti supaya dapat diperkukuh dan diperluaskan bidang tugas jabatan ini.

“Perluasan bidang tugas ini supaya ia boleh merangkul apa yang disebut sebagai institusi hibah (mekanisme pengawasan) atau yang disebut ombudsman,” katanya.

Perdana Menteri berkata, Laporan Ketua Audit Negara amat penting dan beliau sentiasa mengikuti setiap laporan dibentangkan termasuk ketika menjadi Ketua Pembangkang sebelum ini.

“Kalau saya ikuti laporan Jabatan Audit Negara, semasa saya menteri, semasa saya ketua pembangkang, saya akan korek dan teliti setiap halaman untuk memberi teguran.

“Apa yang amat saya kesalkan ialah walaupun teguran sudah puluhan tahun, ia hampir sama dan berulang-ulang. Jadi kita harus naktahkannya,” katanya.